

**Napparsimasup najugaqarfimmi avataani misissorneqarnerani katsorsarneranilu
kiffartuussinerit pillugit Namminersornerullutik Oqartussat nalunaarutaat nr. 2, 24.
januar 2005-meersumi §9 meeqqanut arfinillit inorlugit ukiulinnut ingiaqataasinnaasut
inuit marlunnortinnissaanik Naalakkersuisunut allanngorteqqullugu
aalajangiiffigissassatut siunnersuut.**

Inatsisartunut ilaasortaq Agathe Fontainimit, Inuit Ataqtigii, saqqummiunneqartaq

pillugu

Ilaqtariinnermut Peqqissutsimullu Ataatsimiititaliap

siunnersuutit aappassaaneerreqarnerannut

ISUMALIUTISSIISUTAA

Ataatsimiititaliap suliarinninnermini uku ilaasortarai:

Inatsisartunut ilaasortaq Hans Peter Poulsen, Siumut, siulittaasoq
Inatsisartunut ilaasortaq Anna Wangenheim, Demokraatit, siulittaasup tullia
Inatsisartunut ilaasortaq Mikivisuk Thomassen, Inuit Ataqtigii
Inatsisartunut ilaasortaq Eqaluk Høegh, Inuit Ataqtigii
Inatsisartunut ilaasortaq Mala Høy Kuko, Siumut
Inatsisartunut ilaasortaq Aslak W. Jensen, Siumut
Inatsisartunut ilaasortaq Emmanuel Nuko, Naleraq

UPA2022-imi 3. Maj 2022-imi siullermeerinerup kingorna siunnersuut ataatsimiititaliap misissorpaa.

1. Siunnersuutip imarisaa siunertaalu

Napparsimasup najukkami avataani mississorneqarnerani katsorsarneranilu kiffartuussinerit pillugit nalunaarut nr. 24. januar 2005-meersumi § 9-p allanngorteqqullugu Naalakkersuisut peqquneqarnissaannik siunnersuuteqartup siunnersuuteqarnermigut kissaatigaa. Meeqqat arfinillit inorlugit ukiullit maannakkut nalunaarutaasoq naapertorlugu ullumikkut ataasiinnarmik ingiaqateqartarnerannut taarsiullugu marlunnik ingiaqateqartalernissaat kissaatigineqarpoq. Allanguiniarnermi siunertarineqarpoq meeqqat arfinilinnik ukiullit napparsimanerini tapersortaastrup aapperneqarnissaa, angalaqataasullu meeqqap paaqqutarineqarnerani isumassorneqarneranilu imminnut oqilisaattarnissaat. Nalunaarummi periarfissiisoqarnissaa qulakkeerneqassasoq taamaattoq meeqqat arfinillit inorlugit ukiullit marlunnik angalaqateqarnissaat piumasaqaataassanngitsoq siunnersuuteqartup siunertaraa.

2. Siunnersuutip aningaasatigut kingunerisassai

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinneqarnissaanut aningaasatigut allaffissornikkullu kingunerisassai siunnersuummut tunngavilersuutitut allanneqassasut.

Siunnersuutip piviusunngortinneqarnerani aningaasatigut kingunerisassai siunnersuummut matumunnga naapertuuttut ataatsimiititaliap maluginiarpa. Taamaalilluni nalunaarutip allanngortinnerata kingunerisinnaasaa 125.000 kr.-t 250.000 kr.-llu akornani akeqassasoq naatsorsuutigineqarpoq. Tamatuma saniatigut Nuummi Dronnging Ingridip napparsimmavissuanut Danmarkimilu meeqqat unitsinneqartarnerannut angalaqataasunut siunnersuutip akuerineqarteratigut aningaasatigut ungasinnerusoq isigalugu ukiumut 3,1 mio. kr.-iussapput.

3. Ataatsimiititaliap siunnersuutininik suliarinninera

Aningaasartuutit, peqqinnissaqarfiullu ilungersunartumik inissisimanera siniffillu amerlassusaat pillugit, pingaartumik meeqqat arfinillit inorlugit ukiullit ingiaqataasa Dronning Ingridip Napparsimmavissuani Københavnimilu Peqqissartut Illuanni inissaqartinneqarnissaat pillugu siunnersuut oqallisigingaaarsiarneqartoq ataatsimiititaliap maluginiarpa. Siunnersuut partiinit tamanit iluarineqartoq ataatsimiititaliap maluginiarpa. Allanguutissatut siunnersuutininik imaattunik nassiussisoqarpoq:

3.1. Naalakkersuisut allannguutissatut siunnersuutaat

Inatsisartut aalajangiiffigisassaattut siunnersuut Naalakkersuisut peqquneqassasut napparsimasut angerlarsimaffiisa avataanni misissortittarnerannut katsorsarneqartarnerannullu kiffartuussinerit, tamatumani angajoqqaat ingiaqataasarnerat pillugu aaqquissuusaq annertusineqassagaluarpat nutaamik nalunaarusiortoqarteratigut sunik malitseqarsinnaanersoq misissueqqullugit. Misissuinerup inernerit kingusinnerpaamik UPA2023-mi saqqummiunneqassapput.

3.2. Demokraatit allannguutissatut siunnersuutaat

Inatsisartut aaliangiiffigisassaattut siunnersuut, Naalakkersuisut peqquneqassasut peqqinnissaqarfimmut aningaasatigut kingunissaasa naatsorsorneqarnissaannik, § 9-mi nalunaarummi nr. 2 24. januar 2005-imeersumi, napparsimasup najugaqarfimmi avataani misissorneqarnerani katsorsarneranilu kiffartuussinerit pillugit allanngortinneqassasoq imaasillugu, meeqqanut arfinillit inorlugit ukiulinnut ingiaqataasinnaasut inuit marlungortillugit. Naatsorsuutit innuttaasunut kingunissaanik imaqassapput Peqqinnissaqarfimnullu siniffissanik amerlanernik

pisariaqartitsinerit ilanngullugit.

Allannguutissatut siunnersuutit marluk assigiissuteqartorujussuusut ataatsimiititaliap maluginiarppaa. Nalunaarummik allannguinerup kingunerisassai pillugit misissuisoqarnissaa Naalakkersuisut Demokraatillu allannguutissatut siunnersuutaanni pineqarput. Taamaattorli Naalakkersuisut allannguussatut siunnersuutaat misissuinerup saqqummiunneqarnissaanut piffissaliinermik imaqarpoq.

3.3. Nalunaarutip allanngortinneqarnera

Meeqqat napparsimanerminni ilaquttaminnik qanittumiititaqarnissaat qulakkeerneqarnissaa pillugu siunnersuuteqartoq siunnersuuteqarmat ataatsimiititaliamit paasivaa. Tamatumunnga atatillugu pingaartumik Kalaallit Peqqissartut Illuanni aammali nunatsinni peqqinnissaqarfimmi siniffinnut uninngaviusinnaasunut tunngatillugu meeraq ataaseq marlunnik ingiaqateqarnissaminut periarfissaqalerpat annertuumik unammillernartoqassasoq ataatsimiititaliamit maluginiarneqarpoq.

Nalunaarummi allanngortitsineq angajoqqaat naligiikkunnaarnerannik aamma misigisimatsitsilissaaq, angajoqqaat arfinillit inorlugit ukiulinnut meeralinnut taamaallaat atuutissappat. Arlalinnik meeralinnut aamma ajornakusuussaaq meeraq napparsimasoq angajoqqaajusut tamarmik ilagissappassuk, tamatumunnga atasumik meeraasut allat angajoqqaatik najortiginngikkunikkit.

Siunnersuut akuerineqassappat meeqqanut arfinillit inorlugit ukiulinnut immikkut aningaasartuutit Kalaallit Nunaanni Peqqinnissaqarfimmit akilerneqartussaapput. Inersuarmi oqallinnermi, aningaasartuutit isumaginninnermut suliassaqarfiup ataani inissisimásariaqaraluartoq oqaluuserineqarpoq. Tamanna piviusorsiorpalaarluni oqallinnerusoq, pingaartumillu nunatsinni peqqinnissaqarfik aningaasartuuterpassuaqareemat napparsimasullu katsorsarneqarnissaannik salliutitsisariaqartoq ataatsimiititaliaq isumaqarpoq.

Naalakkersuisut imaluunniit Demokraatit allannguutissatut siunnersuutaat akuerineqassappata, isumaliutissiissutip allanngortinneqarneratigut inatsit allap malitsigisaa qanoq kinguneqassanersoq Naalakkersuisut misissussagaat ataatsimiititaliap kaammattuutigaa.

3.4 Ataatsimiititaliap Naalakkersuisunut allakkatigut apeqquteqaataa

Ilaatigut ingiaqataasarnermut aqqissuusinerup aningaasalersorneqarnissaa aammalu malittarisassat allanngortinneqarnissaannut inatsisitigut aporfiusinnaasut pillugit itisiliissutaasumik nassuiarneqarnissaat ataatsimiititaliamit soqutigineqarpoq. Peqqinnissaqarfiup iluani ingiaqateqarnissamut aqqissuussineq nakorsat naliliinerat aallaavigalugu aqunneqartarpoq inullu ataaseq aallaaviusarluni, taamaattoq immikkut nakorsamit naliliisoqartillugu malittarisassanik saneqqutsinissaq periarfissaasarluni.

Peqqinnissaqarfiup saniatigut suliassaqarfinni allani ingiaqataasut ilaneqarnissaannut

suliniuteqartoqarsinnaaneranut inatsisitigut aporfissaqanngitsoq Naalakkersuisup akissuteqaamminni allappaat. SIK-p isumaginninnermut aningaasaateqarfia aaqqissuussinernut taamaattunut assersuutissatsialaavoq. Pisinnaasat eqqarsaatigalugit assersuutigalugu Kalaallit Peqqissartut Illuanni allaniluunniit peqqinnissarfiup ataaniittuni inissaqartitsinermi ajornartorsiutit tunngaviulluinnartut peernaviangilai. Ingiaqataasunut aaqqissuusinerup annertusineqassappat illunik nutaanik pisariaqartitsisoqartussaavoq taamaattumik pingaaruteqarluinnassaaq aningaasatigut kingunerisassat aaqqiissutaasinnaasullu assigiinngitsut qulaajaasoqarnissaa pisariaqarpoq. Tassungalu ilanngullugu ajornartorsiutit allat tassaasinnaapput soorlu qatanngutit, angajoqqaat tamarmiullutik meqqaminnik napparsimasumik ingiaqataasussaatillugit imaluunniit angajoqqaat suliffimmini sulinatik ingiaqataanerannut atatillugu aningaasatigut ikiorserneqartariaqartarnissaannut tunngasut.

Matumani siunnersuutigineqartup peqqissutsikkut sullissinermi tunngavigisanut naapertuutinngitsoq Naalakkersuisut naliliippu, siunnersuutillu siunertarisaa sukumiinerusumik nassuiarneqarnissaa pisariaqartoq oqaatigalugu. Ingiaqataasut ilaneqarnissaanut angajoqqaat aningaasatigut unammilligassallit isumagineqartariaqarnerannik siunertaqarsimappat, meeqqamilli napparsimasup ilaginissaanut pisariaqartitsisut, suliassaqarfimmit sorlermit maleruagassiuunneqarnissaa aquunneqarnissaalu misissorneqartariaqartoq Naalakkersuisut naliliippu. Tamatuma saniatigut ajornartorsiutip taassuma aaqqinneqarnissaanut tunngatillugu kommunit suleqatigineqarsinnaanerit periarfissaasoq, tamannali kommuninut suli oqaloqatigiissutigineqarsimanngitsoq Naalakkersuisut aamma oqaatigaa. Naggataatigut ilaqutariinnut napparsimasumik meeralinnut oqimaatsorujussuusinnaasoq Naalakkersuisut oqaatigaat, tunngaviusumillu ingiaqataasartut ilaneqarnissaannik siunnersuut pitsaasutut isumaqarfigalugu, tamatumali kingunerisassaasa qulaajarneqarnissaat pisariaqartoq isumaqarlutik.

3.4 Ataatsimiititaliap eqqarsaatersuutai


Meeqqat arfinillit inorlugit ukiulinnut ingiaqataasinnaasut inuit marlunngortinneqarnissaat pillugu aalajangiisoqannginnerani patajaatsumik ilisimasanik tunngaveqarnissaa pingaaruteqartoq ataatsimiititaliaq isumaqarpoq. Tassunga ilanngullugu peqqinnissaqarfimmi immikkoortortaqarfiini, pingaartumik Kalaallit Peqqissartut Illuat nunatsinnilu sumiiffinni peqqinnissaqarfiit eqqarsaatigalugit annertusaanerup qanoq kinguneqarnissaa sukumiisumik allaaserineqartariaqarput aammalu peqqinnissaqarfiup napparsimasunik misissuisarnerata ingerlanneranut sunniutigisartagai eqqarsaatigalugit qanoq sunniuteqassava. Tassunga ilanngullugu aningaasalersuinissamat periarfissat, aammalu ingiaqateqartarnermut aaqqissuussineq, peqqissutsimut suliaqartunit/ ingiaqateqarnissamat nakorsanit tunngavilersuuteqartoqarsimatinnagu peqqinnissaqarfiup avataatigut allanit aningaasalersuisoqarsinnaanera allaaserineqartariaqarput.

Allannguutissatut siunnersuutip saniatigut aaqqiissutissanik arlalinnik ataatsimiitsitaliaq suliaqarnerminni ingerlatsivoq, kisiannili Naalakkersuisut allannguutissatut siunnersuutaat naammattutut nalilerlugu.

4. Ataatsimiititaliap inassuteqaatai

- Ataatsimiititaliaq isumaqatigiittup Naalakkersuisut allannguutissatut siunnersuutaat akuerineqassasoq inassutigaat.


Taamatut oqaaseqarluni isumaliutissiisummilu allassimasutut paasinnilluni matumuuna siunnersuut ataatsimiititaliap aappassaaniigassanngortippaa.




Hans Peter Poulsen
Siulittaasoq




Anna Wangenheim
Siulittaasup tullia



Mikivsuk Thomassen



Eqaluk Høegh



Mala Høy Kúko



Aslak W. Jensen



Emanuel Nûko



Ilaqutariinnermut Peqqissutsimullu Ataatsimiititaliaq
mika@ina.alla.gl & inatsisartut@inatsisartut.gl

Ingiaqateqartitsisarneq pillugu apeqquteqaammut UKA2022/28-mut akissut

24-05-2022
Sagsnr. 2022 - 6571
Akt nr. 20212952

Ilaqutariinnermut Peqqissutsimullu Ataatsimiititaliap apeqquteqaataanut qujavunga.
Apeqqutit matuma kinguliani issuarneqarpoq, akissuteqaatitaanik
malitseqartinneqarlutik.

Postboks 1160
Tlf: 34 50 00
Fax: 34 55 05
3900 Nuuk

Email: pn@naaog.gl
www.naalakkersuisut.gl

- 1) Ingiaqataasup saniatigut ingiaqataasussaq ilassappat angalaneranut aningaasartuut susassaqarfinnit allaniit akilerneqartarnissaa immikkoortoq pillugu inersuarmi oqaluuserineqarpoq, ingiaqataasarnermut aaqqissuussineq peqqissutsikkut nakorsartinnermut toqqaannartumik attuumassuteqanngimmat. Allannguineq taamaattoq peqqinnissaqarfiup avataatigut aningaasalersorneqarnissaa pillugu taamaaliornissamullu inatsisitigut aporfiusinnaasut pillugit nassuiaatigeqqullugit Naalakkersuisoq qinnuigineqarpoq?*

Akissut:

Naalakkersuisut naliliinerat malillugu peqqinnissaqarfiup saniatigut suliassaqarfinni allani ingiaqataasut ilaneqarnissaannut suliniutinik aallartitsisinnaanissamut inatsisitigut aporfissaqanngilaq. SIK-p isumaginninnermut aningaasaateqarfia suliartut pillugit isumaqatigiissutaasunut assersuutissaavoq, tassungalu SIK-mi ilaasortat assersuutigalugu qanigisamik, Peqqinnissaqarfimmi misissortittussamik katsorsartittussamilluunniit ingiaqateqarnermut tapiissutinik qinnuteqarsinnaapput.

Peqqinnissaqarfiup iluani nakorsap naliliinera malillugu ingiaqateqartitsisoqarsinnaavoq, tassanilu inuup ataasiinnaap pisariaqartitsinera naliliinermi aallaaviusarpoq. Naliliisoqarpalli amerlanerusut ingiaqataaanissaat pisariaqariaqartinneqartoq, malittarisassat pingaernerit saneqqunneqarsinnaapput. Saneqqutsinissamut taamaallaat nakorsaanermi eqqarsaatigisassat tunngavigineqartarput.

Tassunga tunngatillugu ilanngullugu erseqqissaatigineqarnissaa pingaaruteqarpoq, Peqqinnissaqarfiup katsorsartittut angerlarsimaffiini akunnittarfinnilu pisinnaasai oqartussaasut allat aaqqissuussinerup annertusinissaanut aningaasaliinerisigut allanngortinneqarsinnaanngimmata. Pisinnaasat eqqarsaatigalugit unammillernartut tassaapput init amerlassusiinut aammalu init ataatsimoorfiusartut annertussusii. Tassalu ilaqutariinnut tamarmiusunut imaluunniit ingiaqataasup saniatugut allamik ingiaqateqatissamut inissaqartitsisoqartariaqarpoq. Taamaattumik ingiaqateqartarnermik aaqqissuussinerup annertusineqarnissaanik suliqaarnerup ilarujussuani avatangiisitigut sinaakkutissat, ilaqutariinnut inissaqartitsiviusut qulakkeerniarneqartussaapput.

Inatsisartut aalajangiiffigisassaattut siunnersuummi (UPA2022/28) siunnersuuttip akuerineqarnerani aningaasaqarnikkut kingunerisassanut missingiutit

saqqummiunneqarput, missingiutinulli taakkununga taamaallaat meeqqat ukiogannightsuniit tallimanut ukiullit ulluni arfinilinni amerlanerusuniluunniit uninngatinneqartarnerat tunngavigineqarpoq. Inatsisartut aalajangiiffigisassaattut siunnersuummi allassimavoq, aaqqissuussineq meeqqanut arfinillit inorlugit ukiulinnut tamanut atuuttussanngorlugu annertusineqarsinnaasoq, tassalu siunnersuummi aningaasatigut kingunerisassat naatsorsorneri, aammalu unittussanut missiliuinerit annertuumik nalorninartoqartinneqarput. Taamaattumik kingunerisassat allat, aamma aaqqissuussinerup qanoq iliorluni atuutsinneqalersinnaanera erseqqissaavigineqartariaqarpoq. Suliamut tassunga ilaatigut angajoqqaat illugiillutik meeqqamut ingiaqataassappata, qatanngutiit ukiukinnerusut aaqqissuussinermut ilaatinneqarsinnaaneranut apeqqut ilaatinneqassaaq. Taakku saniatigut angajoqqaat sulinngiffeqarnissamut pisinnaatitaaffeqarnissaat, aammalu meeraq napparsimasoq angajoqqaanit illugiinnit sivikinnerusumik sivisunerusumilluunniit ilagineqassappat ilaqtariit aningaasaqarnikkut tapiiffigineqarsinnaanerinut periarfissat pillugu apeqqut sammineqassaaq.

Tamatuma peqatigisaanik aalajangiiffigisassatut siunnersuummi matumani angajoqqaat ingiaqataatinneqartarnerinut arfinilinnut ukiullit killigitinneqartarnissaat aaqqissuussinermit peqqissutsikkut sullissinissami annertusineqarnissaa immikkut tunngaviginissaa nalilivigineqarpoq. Taamaattumik aaqqissuussineq Peqqinnissaqarfimmi isumagineqartariaqartutut inissinneqassanersoq misissuiffigineqassaaq. Aaqqissuussaaneermut annertusititsinermit ilaqtariinni qanigisaasut marluk meeqqamik ingiaqateqarnermit ilaasinnaannginnerat iluarsiiiffiginiarneqarpat, aaqqissuussinermit oqartussaasut arlaanni maleruagassiuunneqarnissaa aqunneqarnissaalu misissuiffigineqartariaqarpoq.

- 2) *Siunnersuut akuerineqassagalarpat Kalaallit Peqqissartut Angerlarsimaffiata inissaqartitsinermit peqqinnissaqarfimmi immikkoortuni allani inissaqartitsiniarnermik ajornartorsiutit qanoq aaqqinneqarsinnaanersut Naalackersuisut taasaqarsinnaappat?*

Akissut:

Siunnersuut akuerineqassappat, pisinnaasanik qanoq annertutigisunik annertussusillisoqassanersoq misissuiffigissallugu Naalackersuisut periarfissaqarsimanngillat. Taamaattumik katsorsartittunut angerlarsimaffinni akunnittarfinnilu pisinnaasat qanoq iliorluni maannakkorpiaq Naalackersuisut annertussusilliinissamut aalajangersimasunik siunnersuutissaqanngillat.

Kisiannili oqaatigineqarsinnaavoq, aaqqiissutissatut najoqqutassiassat arlaliusinnaammata. Peqqinnissaqarfimmi katsorsartittunut akunnittarfiit aamma katsorsartittunut angerlarsimaffiit pioreersut allineqarnissaat periarfissaavoq. Imaluunniit Nunatsinni Danmarkimilu ilaqtariit illuinik, ilaqtariit ilivitsuusut piffissami sivikinnerusumi sivisunerusumilluunniit inissinneqarnissaannut naleqquttunik pilersitsisoqarsinnaavoq. Siunnersuutit matuma siuliani taaneqartut maannarpiaq suli sukumiisumik misissuiffigineqarsimanngillat, taamaattumillu siunnersuutit aningaasaqarnikkut aqutsinikkullu kingunerisassaat nassuiaatigineqarsinnaanngillat.

- 3) *Oqartussaaffiit allat soorlu kommunit ajornartorsiutinik aaqqiissuteqarnissamut periarfissaasutut Naalackersuisut isumaqarpat?*

Akissut:

Kommunit ingiaqateqartarnermut aaqqissuussinerit pillugit suleqatigineqalersinnaanerit Naalakkersuisuniit ilimagineqarsinnaavoq. Kisiannili maannarpiaq suleqatigiinnissamut periarfissat paasiniallugit Naalakkersuisut kommuninut attaveqarsimanngillat. Taamaattumik qanoq iliorluni aammalu oqartussaaffiit arlaata iluani suleqatigiinnerup aallartinneqarsinnaanera pillugu Naalakkersuisut tamakkiisumik nassuiaateqarsinnaanngillat.

4) *Sammineqartumut attuumassuteqarsinnaasunik Naalakkersuisoq paasissutissaateqarpa?*

Akissut:

Ilaqutariit meerartik peqqinnissaqarfimmi misissorneqartariaqaraangami immaqaluuniit katsorsartittariaqaraangami angerlarsimaffimminniit aallartariaqalerarnerat ilaqutariinnut annertuumik artukkiisartoq Naalakkersuisut ilisimavaat. Taamaattumik ilaqutariit pitsaanerpaanik sinaakkusiiffigineqarnissaat qulakkeerniarlugit Naalakkersuisuni suliniarpugut. Tamanna pissutigalugu angajoqqaat ingiaqataasarnerinut aaqqissuussinerup annertusineqarnissaa pillugu siunnersuut Naalakkersuisunit taperserreqarpoq, kisiannili maannarpiaq suliassaqarfimmut maleruagassat allangortinnerisa sunniutissai tamakkiisumik ilisimaneqanngillat. Tamanna pissutigalugu aaqqissuussinermik annertusititsinissaq atuutsinneqalertinnagu, pissutsit misissuiffigineqarsimanngitsut arlallit qulaajarneqarnissaat pisariaqarpoq.

Inussiarnersumik inuulluaqqusillunga



Mimi Karlsen